

四庫全書

集部

欽定四庫全書

穀城山館集卷十二

明 于慎行 撰

七言律詩

送張洪陽年兄上南少司成二首

西清法從沐恩偏
日日論思捧御筵
豈謂廷中摧五鹿
復教門下紀三鱣
離聲薊苑河橋雨
別夢秦淮月夜烟
十載同遊詞賦客
只今結綬是君先

離合相看一愴神百年寵辱夢中身
無將建業秋江水不及長安綺陌塵
天畔文星珠斗近座中時雨絳帷春
應知煖席無多暇又奉徵書入紫宸

送孫栢潭太史冊封唐藩便道省覲

射策名高賈洛陽青春擁傳有輝光
花迎玉節槎凌漢葉剪桐珪土胙唐
客路千門江上月主恩三殿署中香
非關畫錦偏生色自是庭幃寵渥長

送盛鳳岡太史冊封蜀藩

寶玉親頒示展親還因諭蜀論過秦雲凝閣道青天險
家近關門紫氣真玉節遙分三署色金羈行耀五陵春
懸知萬里橋邊路共指軒車問使臣

題韓敬堂殿講牡丹石榴畫卷時值雙壽稱觴
並呈此瑞

仙種何年福地栽巧分春色艷亭臺丹房並倚珠林結
繡萼雙依翠幄開味勝緋桃金母醉花先紅藥侍臣迴
合歡正值稱觴日滿目天香拂酒杯

送沈少陵太史請告

鶯燕晴嬌禁苑春
冥鴻何意出風塵
到來天地傷多事
歸去江湖尚有人
射策彤庭干氣象
上書黃閣想風神
敬亭秋色堪高枕
不負蕭條報主身

同可大城西寺樓眺望

石林香岫鎖氤氲
百尺危闌倚落曛
雙闕湖光涵鏡彩
九陵雲氣吐龍文
烟銷野色愁中見
風起邊聲醉裏聞
諧俗不妨聊對酒
從他塵世自紛紛

觀慈壽寺新造浮圖

鳳刹新從佛土標芙蓉千尺翠嵒巍璇題玉甃中天起
法雨曇雲下界飄勢挾珠林雄禁苑影分銀漢掛烟霄
羣生福果緣慈祐輦盡黃金此地銷

夏日登毘盧閣

寶界高懸百尺樓丹梯半上不能休
牕臨星斗諸天近壁繞烟霞五月秋
迢遞羣山橫大漠蒼茫一氣辨皇州
憑闌欲起悲歌色人代何緣此勝遊

夏日崔明經正思五弟同遊韋園

韋曲城南曉霧開
炎天深樹鎖亭臺
漁舟隱見花間出
鷗鳥浮沈杖底來
香散芰荷殘
過雨烟飛蘿薜冷
銜杯
帝城風物家鄉侶
醉倚青林首重迴

送朱輦峰鴻臚之金陵

二十年來憶舊歡
相逢斗酒醉長安
尊前華髮流光易
陌上驪歌別路難
江月遙分鵲鵲觀
宮雲不散駿驕冠
到來綿蕞開王會
劒佩聲中擁漢官

秋懷四首

露下天空木葉流滿懷蕭瑟一登樓江湖鴈影催鄉夢
城闕砧聲起暮愁萬里風塵燕塞遠千門雲月漢宮秋
紅顏華髮悲生事金爵銅駝感壯遊

極目高空一鴈翔十年萍跡滯天方芙蓉曉露愁邊白
薜荔秋山夢裏蒼病似相如聊著賦鬢如潘岳尚為郎
凭闌此際渾無賴日晚寒生畫角霜

風入疎林月半橫秋聲一夜壯心驚柴桑故自饒歸興

中散由來少宦情，名利百年身易老。
文章千古事難成，恩深未報慙明主。
苦憶深山桂樹生。

舊隱林皋幾放歌，蓬玄西洞長烟蘿。
清溪日落魚梁出，翠嶂天長鳥道過。
醉裏白雲揮袖滿，秋來明月倚闌多。
不辭便作風塵客，鶴怨猿驚可奈何。

秋日荅李本寧太史秦中四首

西風蕭索五城秋，望斷秦關感舊遊。
一自宮磚虛日影，至今仙署想風流。
鴻歸上苑書重到，月落楓林夢亦愁。

聞道龍門連太華何人得並李膺舟

斗畔何年少歲星寧帷聊復試傳經
關門氣自車邊紫太乙藜從閣上青
忽見雙魚傳札素疑聞三鱣落階庭
不知玉女峰頭座可許生徒隔帳聽

慄慄霜天萬木聲愁看落葉太縱橫
青山已自盈秋色白眼從來冷世情
經術但傳秦博士疎狂莫笑魯儒生
加餐鄭重勞相念祇有庭蘭夢未成

千里離愁鬱不開故人佳句傍誰裁
秦臺鳳女簫三弄

漢苑仙人露一杯
歲月吾甘梅尉隱
乾坤爾自賈生才
春來若有書相問
尺素應知海上迴

秋日書懷奉寄二兄

避世年來華髮侵
秋情旅思兩蕭森
虛談仗馬當時事
實負冥鴻萬里心
客裏常思陶令酒
愁邊幾作越人吟
天涯兄弟長相憶
明日青山是舊林

答鄔汝翼見寄

積雨挑燈思不禁
開緘忽見楚人吟
芙蓉自抱三秋色

鴻鵠誰知萬里心別憶青尊江樹杳夢回明月海雲深
無勞漢署懷方朔金馬于今總陸沈

奉旨代撰恭祝聖母萬壽二首

寶祚恭膺幸有年為承慈訓化機旋東朝共祝增仙算
大內親趨捧壽筵律轉一陽熙舜旦石將五色補堯天
母儀仰見超前古圖史應令萬禩傳

璇霄南極現祥光入仗親稱萬歲觴寶座三重開內殿
法音九部舉東廂華嵩效祝春難老袞繡承歡日始長

願酌滄溟添壽紀年年流慶衍天潢

秋日有懷伯仲兩兄

一鴈橫空玉塞寒疎星淡月倚樓看鄉山有夢秋先到
京洛無心興已闌多病長卿聊罷酒長貧仲子未彈冠
鵲原別恨年年劇無那浮踪去住難

冬至南郊扈從紀述和陳玉壘太史韻八首

聖后乘乾奉帝禋日躔南陸協靈辰九關肅啓天門鑰
萬姓歡隨御輦塵樓雪初融丹禁曉葭灰微動玉衡春

虛慚珥筆親文物實有甘泉賦未陳

平明闔闔五門開法駕駉驪匝地來雷動千乘天廐選
颺馳七校羽林材金支翠蓋雲中轉紫旆紅幢樹杪迴
清蹕尚喧雙鳳闕前驅已戾九成臺

陽靈仙館翠雲端竹殿清齋禮泰壇閣道霓旌陳虎豹
宮門羽仗簇鴛鴦親軍競帶千金劍御馬齊籠七寶鞍
總為天光依較近溫泉午夜不知寒

玉蘭東畔畫簾前到處常隨豹尾旋聖代儀文今日盛

儒臣雨露向來偏
琅函賜錦馳中騎
寶鼎分餐出御筵
齋室受釐應有問
朝回猶恐夜深宣

絳闕陰沈啓秘局
鑒典肅穆欸真庭
霜凝碧落天衣濕
月上仙壇玉樹青
帝座三重開萬象
雲門六變走羣靈
祠臣秉笏香烟裏
時向珠纒望景星

絳節氤氲上太清
紫烟縹緲冠層城
鵷行不動瑤池影
鳳幄微聞玉藻聲
律應一陽璇象轉
福凝五位泰階平
禮成回蹕傳行漏
百尺華燈闕下明

燈火薰天夾路旁，屬車旋處翠華張。
非烟擁蓋璇霄麗，若月乘輪御陌長。
十里香花連泰畤，千門鼓吹徹昭陽。
皇誠已自通天貺，萬祀應知寶祚昌。

紫氣葱葱繞禁廬，南郊迎日履長初。
皇王禮樂光前殿，侍從聲華滿後車。
漢時龍麟金匱紀，周臺雲物彩毫書。
雄文亦是鄉人似，齊客談天恐不如。

題李崇軒太史風木卷

水部才名世所傳，平生舊事付新鐫。
青箱累葉承先慶，

金匱要略卷十二
王署重輝啓嗣賢天上樓成曾有夢人間鶴去不知年
只今隴草悲仙吏歲歲春風泣杜鵑

葛端肅公輓章四首

朱輪幾日下明光一夜台星遽掩芒名德累朝耆舊盡
風流前輩典刑長百年海嶽收靈氣三省官僚紀奏章
莫訝臺烏來去少荒原終日咽長楊

五十年來社稷身世皇時已畫麒麟車行陝潞千家雨
戟擁幽并萬里春北極星辰三聽履東山烟月幾垂綸

九重此日宮懸徹鼓吹黃腸寵使臣

華年聲價省郎遊一節冰霜到白頭降嶽神生星應昴
濟川功就壑藏舟朱門舊第公槐影落葉新阡宰樹秋
惟有故時雙鶴在月寒華表不勝愁

里閑衣冠舊侍公每從便坐接春風臺端劒履容猶在
海上桑田事已空畫閣勲名應自遠蘧廬夢覺總難窮
不堪片語牛山望千古英雄涕淚中

雪中臥病楊廬山至京枉過

春城雨雪臥袁安仙令朝天駐錦鞍萬里風塵隨聚散
百年湖海見交歡翻疑夢杳羅浮月好在香分畫省蘭
伏枕燒燈渾未厭坐來鴝鵒夜光寒

送楊廬山之官鹽城

宮草含青雪未消送君斗酒夜迢迢愁邊曉月雙鳬遠
醉裏晴雲五鳳嬌澤國魚鹽多負海春城烟雨半通潮
只今滿目看萑葦豈藉催科荅聖朝

病中朱廷平可大攜談易王生見過書懷

宣室情知久荷恩
旅愁無奈泥芳蓀
十年玉署塵心冷
一片青山素業存
病裏風雲天北闕
春來花樹魯東門
欲知朝市浮沈理
李主長安好共論

病中乞歸懷寄中立王孫

銀榜仙宮桂滿巖
何時雪夜掛孤帆
枕中鴻寶新來註
海上魚書舊日緘
千里歸心看短劒
百年病骨付長簪
王孫苑路今應近
芳草春風點碧衫

都門留別諸丈

不緣多病壯心消敢向清時遠市朝三殿恩華淹日月
十年歸夢落漁樵宮雲欲散飄衫袖別酒初醒見柳條
最是河梁分手地桃花潭水碧迢迢

潞河寄都下舊遊

承恩霄漢苦思歸祇憶深山長蕨薇去漢梁鴻藏姓字
還叩司馬借恩輝身輕已覺愁顏改戰勝應看病骨肥
回首金閨多舊好別時情思各依依

嘉靖壬戌從三兄無擇下第同歸有過桃花口

詩至萬歷己卯請告南還復過此地詠兄舊
句悵然有感用韻追和

廿載津亭唱櫂過依然烟柳夾長河
花源尚記來時路
鴻影空憐舊日歌
人代三朝看過隙
生涯萬事付流波
雙棠舊館應無恙
獨撫遺編思若何

除夕呈二兄

鄉閭風土弟兄居
冉冉年光歲又除
勝裏金花聊共賞
尊中栢葉肯教虛
居隣碧海三山路
交絕長安七貴書

猶有謝家辭翰在春山遊眺許誰如

庚辰元旦試筆

簫鼓初闌旭日開小庭春色欲重來
靈符舊篋金閨賜寶勝新粧玉剪裁
歡洽兒童隨笑語恩深禁闕憶趨陪
誰將栢葉調仙酒為薦君王萬壽杯

寄懷朱廷平可大兼訊于澤州子冲入覲

歸來無日不思君畫省風流久未聞
上苑鴻聲愁處聽長亭春草醉時分
雙龍自合天邊氣五馬遙停塞上雲

莫問同時舊年少已從樵牧隔人羣

寄賈石葵廷尉

百年踪跡總飄萍
懶向風塵問醉醒
臥病梅花江上白
懷人芳草夢中青
天懸臺館占卿月
地入江湖隱客星
聞道乞歸歸未得
主恩不負草堂靈

春日山中有懷趙潑陽年丈時官南越

不關寂寞重相思
心折長安握手時
萬里銅標人落魄
十年金馬事參差
眼青楊柳東風日
頭白梅花北向枝

惟有魯狂容聖世五湖烟水足恩私

山中書懷荅朱可大廷平二首

海水天風莫重論吾曹交誼向來敦馮驩長缺應猶在
范叔綈袍故自溫千里人歸孟諸野十年客散信陵門
閒心已絕諸緣累獨有平生未報恩

天末懷人思不降夢回明月滿軒牕平生諾重黃金百
國士名齊白璧雙君自風塵淹畫省吾甘漁獵老滄江
書來正值山間醉赤脚吹笙臥石淙

上外祖母麻王二太夫人七十偕壽二首

元公宰木閭居諸二母仙
闔鶴髮餘盍裏尚藏金
殿草座中時展玉函書
幾看萊服連鳩杖時過
潘園並板輿勝節稱觴
應具醉春江昨夜罩雙魚

堂上春深並錦袍中丞甲
第五雲高麻姑自閱桑
成海王母親栽樹作桃
舊德共看麟閣畫餘光
殊有鳳池毛恩深自出
無由寫頌壽應慙乏彩毫

香山寺閣同朱令君賦

寺在邑城北河上

海嶽秋光幾處看
珠林高閣此憑欄
河流曲抱孤城遠
山色低邀落日寒
野思蕭條聊對酒
愁心跌宕罷彈冠
仙遊幸躡王喬履
夜月雙鳬去不難

曲阜謁顏廟

素王宮闕魯侯臺
充國崇祠此並開
位冠元公師友會
道同皇佐古今才
虛亭玉甃疏簪井
舊巷璇題鎖繡苔
門外依稀餘輦路
前朝曾覩翠華來

鄒縣謁孟廟

邾城舊里記三遷廟貌弘開大道邊行地江河疏聖派
談天與衍閑言筌洙流近映金鋪日嶧嶂高含畫棟烟
北望孔門元咫尺明禋終古侍雕筵

趙莊泉流觴

處處名泉盡客歡一泓復向道旁觀林衣倒拂仙杯動
石髮晴分寶鏡寒要眇琴聲流水和踈狂酒態野人看
他時漫擬蘭亭勝不似滄洲有釣竿

杜曲泉贈杜長君太學

十日臨流幾醉醒
又從杜曲俯清泠
參天翠樹全成幄
夾路芳泉半似星
水色平侵春草綠
山光遙映暮雲青
狂遊無奈逢豪客
倒盡君家碧玉鉶

遊嶧山還過魯城西郭有懷中立王孫

二十年來感舊遊
綠雲遙見隔城樓
逢人恐識關門氣
訪客真成雪夜舟
魯國山川空自賦
梁園松桂為誰秋
何時却有論文地
尊酒同銷萬斛愁

田鍾台殿讀初春
詣闕是秋即請告
南旋寄此

戲問

春深裁報謁彤扉為底逢秋又拂衣
舊隱青山何處問
同遊詞客幾人歸
囊中大藥還多少
天上浮雲可是非
萬里搏風應有待
且隨陽鴈往來飛

周亭山先生舉明經入對

名家魯國舊登壇
初捧賢書解鵬冠
貢篚璆琳天府受
閭門羔鴈里人看
燈分夜色青藜迴
筆擁春雲紫殿寒
儒術年來多所遇
明經半補漢郎官

同朱可大廷平登岱八首

終古名山奠大東遙瞻雲漢倚穹崇
千峰明滅天高下萬壑晴陰氣鬱蔥
星土盤回元化轉仙閣繚繞百神通
真遊五嶽何當徧首躡烟蘿上碧空

玉闕朱樓萬仞端六龍輦道倚巔岏
懸厓翠磴雲中轉壘嶂紅泉樹杪看
海色曨曨三觀曉秋聲蕭瑟五松寒
天門咫尺君應見比似人間路更難

忽出塵寰賦壯遊試從九點辨神州
浮雲直上千峰色

落日長懸萬里秋，紫塞東臨滄海斷。
黃河北遶大荒流，秦封漢禪成丘土。
留與人間不盡愁。

倚杖高臨萬玉峰，氤氲陸海散芙蓉。
寒聲半落天中雨，暝色低催澗底鐘。
金檢誰探秦帝策，白雲猶起漢時封。
君看十二侯王地，能出神宮第幾重。

絕頂秋高上帝宮，茫茫一氣俯寰中。
地盤河濟三州盡，天入秦吳萬里空。
玉闕光連星斗上，丹峰影落海門東。
亦知真宰多相藉，許倚烟霄兩劒雄。

萬仞瑤壇冷夕曛斗邊三十六天分仙人洞府懸雙闕
玉女神房切五雲遊客自成梁父嘆詞臣不草茂陵文
東皇舊握羣生紀海國河山翊聖君

高丘東望氣雄哉海色遙看萬里開三島春波涵日月
五城仙氣吐樓臺酒邊影吸金銀動杖底雲飛紫翠來
烟水茫茫徐福去至今不見報書迴

上宮夜色冷漫漫月轉層霄十二欄大地河山銀作海
中天樓閣玉為壇虛無靈境簫聲斷縹緲秋光練影寒

仙掌芙蓉看欲近轉從北斗識長安

遊靈巖絕頂却望泰山玉皇觀

珠林丹嶂倚秋曛絕頂開尊俯鴈羣萬木寒飛金地雨
五峰晴幻紫霄雲上方臺殿尊前湧大國河山鳥外分
回首天門歸指顧玉皇曾授赤靈文

玉函山眺望

即千佛山

岱宗直北玉函開海客乘春躡屩來絕壁松杉含寶相
中峰雲氣出香臺湖邊萬井烟光動城上雙河練影迴

青鳥不歸丹鷺遠仙踪佛地兩徘徊

望雲翠山絕頂

乾坤靈跡自何年縹緲孤標斗際騫矗立千尋疑掛日
削成一柱欲承天蓀房近傍瑤壇路鳥道晴飛玉洞烟
岱嶽西來如萬馬千峰雲氣總相連

望嶼山

美盡東南第一峰神工削出玉芙蓉天門閣道金銀晃
王母瑤臺紫翠封雷雨千巖聲自起龍蛇萬壑勢相從

探竒忽動憑虛想安得仙人九節筇

山北有
王母臺

答客書勸還闕

三年孤枕臥人間秋色嵯峨滿碧山
梅福不緣逃世隱揚雲聊得著書閒
情知相府常開閣可奈書生自閉關
珍重故人相問訊已甘蘿薜老紅顏

贈侯甥允吉秀才

吾家宅相貴鍾君名列諸生氣不羣
彩鷺摩空千仞羽神駒鑠電五花文
中丞舊護漁陽甲上將新營細柳軍

兩世箕裘須爾繼好將雙管躡青雲

山中述懷寄石葵賈丈

秋山明月鴈來聲魯國相看自兩生聖世安危應有寄
詞臣去就豈關名跡隨猿鶴心能化夢入鷗鷺骨尚驚
辜負桓譚知已在玄經寂寞幾時成

壽高三塘徵君六十徵君邑丞兄也揚子人

江上名家舊業傳蘭塘一艇狎風烟楚山桂樹留真隱
秦洞桃花閱大年賦就秋濤淮海月夢餘春草汶陽天

更逢寶筵重開日綺席霞觴接羽仙

代壽高三塘徵君

璇極星華燭絳霄人間仙算紀松喬丹臺日映黃金蕊
海屋春凝碧玉簫樓闕三山瓊島月池塘一派廣陵潮
藍田吏隱多鄉夢桂樹淮南未可招

濟上對玉函山送子冲北上

萬事悲歡可具陳十年五醉濟城春居然華髮生明鏡
無恙青山對故人老去交情堪自見狂來酒態轉相親

路傍莫訝雙龍劍雌伏雄飛各有神

山中秋日報朱金庭宮庶

空山寥廓鴈聲寒忽啓緘書出上蘭臥病秋風閒自賦
懷人明月遠相看生涯湖海雙蓬鬢身事乾坤一釣竿
聞道橫經承內渥還從折角笑彈冠

山中秋日代書寄王對南宮庶

丹楓蕭瑟倚重樓回首金閨憶舊遊片月常懸蓬島夢
尺書幾隔鴈門秋新傳謔笑還多少舊和歌聲可記不

亦有行踪君莫問三年漁獵海西頭

寄羅康洲宮諭

臥病山中華髮侵秋江松桂稍成林主恩幸自容蕭散
客難誰應學陸沈千里星河天上夜百年萍梗別來心
儒臣畫閣今應近三殿卿雲歲月深

寄韓敬堂殿講

秋山別思眇愁予天杪同心久索居雙闕星辰分劔佩
萬峰烟雨狎樵漁舊遊數對平原酒遠地難逢上苑書

欲問談詩韓太傅門牆多士盛何如

寄沈蛟門宮諭

銅龍闕角舊時分屈指風雲已到君
天隔鵷鷺應有夢人隨猿鶴自為羣
斗間劒氣寒相映江上書函杳未聞
別後才情渾欲減惟添瘦影似休文

寄黃儀庭宮允

班荆闕里笑相看寶馬金羈識漢官
別去梅花江上老秋來明月夢中寒
詞臣寂寞猶鴛列隱客疎狂自鶻冠

傳道橋門懸絳帳五更經術首登壇

冬日徐檢菴殿讀北上過訪

契濶人間未易論。勞君越陌枉相存。尺書久絕南天鴈。
斗酒猶銷別日魂。欲笑子牟懷魏闕。曾隨方朔隱吳門。
鸞扉舊侶應垂問。竊吹青山是主恩。

扈從春際上陵四首

諸陵王氣接神京
法駕春禋出禁城
萬戶鶯歌迎鳳管
九衢花雨拂霓旌
連山地入長楊苑
夾道兵陳細柳營

負橐趨陪知最寵
屬車徐動扈天行

隔夜鑾車駐翠微
平明魚鑰啟彤扉
宮前七校傳刁斗
馬上千官著賜衣
地轉鈎陳成象緯
山開雲物寫恩輝
春遊遠薄橫汾曲
祖德宗功信不違

雲間神闕九關開
樹杪仙輿萬乘來
霧雨蕭蕭陰輦路
松楸鬱鬱鎖城臺
縱金大樂空山應
裸玉崇儀列辟陪
聞道龍衣親負土
漢家原廟不勝哀

六龍迴馭苑西天
湖上春陰敞御筵
山繞離宮金作嶂

水依行漏玉為泉駢駢滿路花香裏燈火薰霄樹影邊
百里昆明連太液鏡歌九部引龍船

送秦舜峰中丞出鎮南贛

詞林早日侍甘泉幕府勲名起少年大國提封連瘴海
中丞使節護樓船秋聲夜渡三江雨兵氣晴銷百越烟
此別不須頻佇想油幢幾日欲朝天

報李本寧太史書蕪訊東遊

沅芷澧蘭別思虛江湘何地擁離居秋風不下孤黃鵠

明月空傳雙鯉魚
華髮交遊應更少
清時才儁好誰如
懸知太史東遊後
玉簡重編禹穴書

贈長安四李生

李生中貴從子皆及子門
三為博士弟子其一武生

文武翩翩總俊髦
長安閱信多豪春
城起第新行馬
內殿承恩舊賜袍
已見三雍收異等
還聞七校試雄韜
金門貴近應無數
不似名家有鳳毛

九日有懷可大

秋水茫茫入望賒
美人何處賦蒹葭
霜前又度三秋鴈

客裏重看九日花
南國音書淹歲月
東籬節序付烟霞
登高那復多愁思
白露朝來染鬢華

題蓮花菴水亭

西湖流入北城陰
小築祇園切禁林
閣上旃檀風細細
水邊雲樹影沈沈
天花曉落千門雨
仙梵寒飄萬井砧
咫尺青蓮成淨土
將因不染印禪心

穀城山館集卷十二

欽定四庫全書

穀城山館集卷十三

明 于慎行 撰

七言律詩

春初得吳太原道中書有懷

草色春城嘆索居
虛窓殘月渺愁予
忽從五馬邊淮路
傳得雙魚隔歲書
汾水東流連朔塞
關門北望是穹廬
晉陽亦是談兵地
莫使平時保障疎

送董巢雄比部左遷上谷衛幕

匡時獨抱杞人憂，諫獵書成更遠遊。
逐客夢隨青海月，仙曹香散白雲秋。
惠文列署閒霜簡，神武新軍卸錦韉。
報國猶餘長劍在，不須常撫大刀頭。

寄送邢侍御子愿晉叅楚藩

芳草春前縮別愁，除函又下殿東頭。
書回閭闔千門月，人上芙蓉萬里舟。
望斷浮雲燕市遠，歌殘白雪楚天秋。
依然法從偏承寵，三十叅藩是壯遊。

平則城樓登眺

岌嵒飛閣冠層城
暇日登臨景物明
萬戶鶯花春上苑
九衢車馬漢西京
烟開宮柳重重出
雨靜峰霞片片生
總是皇州多麗景
五陵芳草殫遊情

寄上外舅秦翁生辰

紅顏閱世儼如仙
絳縣將盈亥首年
三島常浮滄海上
一峰突起岱宗前
同時父老遊誰健
舊社桑麻樂自偏
聞道華辰新酒熟
杯中太乙是青蓮

蓮花菴潭上夕飲

禪宮遙倚北樓開樓下平湖落照來
金水環城全象漢蓮花湧寺宛成臺
諸香各捧空王座一葉能浮太乙杯
便是忘歸歸亦醉夕陽清角莫相催

北閘

西城別苑勝瀛洲十里平湖靜不流
岸草離迷橋畔雨宮槐隱映水邊樓
聲傳簫管三天近香散芙蓉六月秋
信道吾皇簡遊幸石鯨飛處鎖龍舟

送姊倩侯將軍僉書留京樞府二首

長安別路起征鉞，笑攬金杯視佩刀。
舊國風雲開節鉞，故園花柳過旌旄。
居臨六代青山近，望入千門紫氣高。
聞道江南多俠少，將軍一爲試龍韜。

上將璇樞切禁林，登壇自識主恩深。
雲連城闕江聲壯，節擁樓船海氣陰。
宦轍百年萍梗路，離筵千里弟兄心。
廟堂正復思頗牧，豈有雄才可陸沉。

九日留都瀛洲會集呈諸館丈

石渠仙署接朝陽綺席秋開白玉堂九日風烟吳禁苑
兩都賓主漢詞章城依雙闕盤龍虎池繞高臺集鳳凰
館閣先朝多故事羣公勲業踵三楊

南都諸公邀宴高座寺對雨

天畔虛堂倚碧岑坐來烟雨動蕭森白雲暮結蓮花座
陰壑寒生桂樹林三楚江山遊子興兩都詞賦主人心
南朝舊寺應無幾寂寞高臺自古今

祠部李修吾駕部倪雨田虞部黃澹菴邀登牛

首

山盤曲徑萬松寒轉盡仙梯一倚闌雙闕餘霞江上落
千峰踈雨座中看風飄上界鐘聲遠日冷前朝木葉丹
幸從仙郎分勝賞欲攜秋色入長安

方仞菴陶蘭亭二比部邀遊棲霞寺

禪宮遙對石城開上客邀歡載酒來霞散千巖成佛土
天開雙峽鎖香臺齊梁文物餘殘刹吳楚雲山映舉杯
正自登臨多感慨秋聲蕭瑟若為裁

太虛亭望金陵亭在攝山絕頂

孤亭高倚暮雲秋
平楚蒼蒼望石頭
紫氣微分雙闕影
白雲中斷大江流
蕭森落木來悲氣
迢遞青山入壯遊
王業千年根本在
燕吳兩地對皇州

遊甘露寺絕頂望金焦二山作示鄔汝翼陳從

訓

北固峰頭醉倚闌
兩山秋作畫圖看
海門對湧青霞闕
江面雙浮碧玉盤
風靜帆幃行樹杪
天空樓閣出毫端

不堪作客逢搖落二妙悲歌和更難

金山

江面孤峰秀絕羣芙蓉千尺鎖氤氲諸天臺殿空中湧
四壁烟霞鏡裏分鼉窟長懸朝暮雨龍宮時散往來雲
登臨况值秋風起萬里濤聲不可聞

焦山贈郭次父

千盤鳥道上珠林蕭瑟秋悲未可禁江北江南烟樹色
峰前峰後海潮音孤標自擢芙蓉影片石長飛鸞鷺陰

不向烟霞逢地主古今隱迹迥難尋

廣陵張郡丞宴大觀樓

城上高憑百尺樓使君開宴俯江洲坐臨南北孤峰影
目盡乾坤萬里流雨色猶分京口樹濤聲欲賦廣陵秋
何來一曲桓伊笛寥落長天動客愁

石介峰同卿邀飲豐樂亭

湖上青山俯郡城孤亭無改昔賢名杯銜落照千林影
檻倚長天一鴈聲寒雨自憐征路遠重闕誰識戰場平

恭瞻聖祖飛龍地紫氣盤回接舊京

閏九月朔日姜民部養冲邀登黃樓夜飲

風露嚴城欲暮秋重闌燈火上黃樓山邀夜色當杯入
雲擁河聲抱檻流片石長留蘇子賦荒原不散楚人愁
論文况是登高日藉甚逢君自勝遊

過夏鎮新河有懷先師朱大司空

廿載談經憶舊遊司空勲業此乘舟人烟尚記河橋夜
漁火重經水國秋地近徐方多故壘渠分禹跡總安流

不堪閱代成今古花樹西州涕未收

乙酉九月從李元甫宮諭再登嶧山

舊隱名峰岱嶽前重扶秋雨上層巔陰厓尚駐千春草
險磴爭飛萬木烟河勢遙分雙白練山形近作九青蓮
狂來欲問巴渝客得似華陽幾洞天

觀張隱君雙梅圖

浣花溪畔即方塘別有羅浮兩樹霜國色並呈縣圃玉
寒英對點壽陽粧尊前月凝重重影笛裏風飄片片香

聞道上林春更早可知仙骨占羣芳

送鄒四山太史冊封岷藩便道省覲

名家儒術素風敦奉使天潢布主恩詔出螭頭周內史
國分鷄尾漢王孫秋聲七澤飛征蓋雨色三湘近里門
到日趨庭應有問雄談碣石向誰論

送季大承太史冊封韓藩

西涼烽堠接咸京詞客輜軒幾日程玉節分茅臨絕塞
朱門列戟滿孤城鳴笳細雨回中路飲馬寒流隴上聲

聞道空同仙館在好將真訣覓蓬瀛

送蕭漢冲太史冊封秦藩

銀潢百二舊河山璽綬新恩侍從頒日映丹泥分漢闕
天浮紫氣度秦關逢秋露下仙人掌望嶽蓮開玉女鬟
自是鳳凰池上客錯疑蕭史駐雲間

送李棠軒年兄上南少司空二首

不堪握手悵離居柳色都門漸欲疎佩借司空蒼水玉
篋藏學士紫泥書宮磚日影虛鈴閣驛路秋聲過錦閭

負弩三巴應更有幾人詞賦似相如

前年同賦秣陵秋
隔歲憐君訪舊遊
風雨獨過朱雀桁
烟波還記白蘋洲
兩都文物歸仙吏
八座聲華滿帝州
莫戀江南好風景
直廬空鎖鳳池頭

張洪陽學士在告問疾

碧草重門似灤東
十旬休澣度春風
歸心桂樹生江浦
渴病金莖出漢宮
斗際龍光是劍杯
間蛇影自爲弓
知君早鍊神仙骨
且向堯時作侍中

送唐曙臺客部告還南海用王宗伯韻

清時何意厭朝叅郎舍頻抽碧玉簪
萬里親聞炎海上十年歸夢大江南
雲霞近傍仙城五松菊重開客徑三
閉戶書成應更早好令白馬絀玄談

金山望湖亭

孤亭斜倚碧山隈檻外明湖對舉杯
萬頃玻璃天上出千巖紫翠鏡中開
雲連閣道籠春樹雨過行宮鎖繡苔
盡說昆明雄漢苑無如此地接蓬萊

西山上華嚴寺

空盤一徑躡珠林絕頂憑軒氣鬱森磴道松杉晴作雨
洞門蘿薜晝成陰秋橫城闕青山迥地繞園陵白露深
回首千門車馬路翠華前日此登臨

答楊戶部廬山書時方謫居廣陵

淮南桂樹又春殘幾度開書慘不歡華髮已曾淹畫省
銅章那復滯鹽官秋空雁影愁應劇夜雨潮聲夢亦寒
聖主長楊方校獵誰將賦草入長安

送徐端銘太史冊封衡藩便道迎養

十二提封屏翰雄又頒丹詔下梧宮
漢京首列諸王表吳客初陳大國風
三觀春陰滄海上九河晴色畫舟中
還朝更遂籃輿養却笑安仁賦未工

送唐抑所太史冊封鄭藩

三策天人漢大儒親銜尺一下周廬
紅亭斜日乘槎外紫殿春深視草餘
斗畔星潢開使節河陽花柳過仙輿
賢王若問蘭臺史已列先朝諷諫書

鄭國主嘉靖中
上疏建言故云

送周寅所太史冊封周藩并寄沈蛟門學士

夷門堤下大河流
詔使軒車駐綵旂
梁苑詞人空作賦
漢家王子盡封侯
江頭片雨春帆渡
海上明霞晝錦遊
爲憶文園病司馬
金莖別夢已三秋

送彭肯亭太史冊封瀋藩便道過里壽太公九

十

潞子城頭紫氣懸
詞臣持節下從天
綈函借日開銀牘
綺閣飛花映醴筵
踈雨寒聲汾水上
白雲秋色太行前

江鄉更待趨庭慶共羨彭鏐閱大年

送李榕厓諫議冊封荆藩便道省覲

方懷諫草侍螭頭復捧桐圭問鷁舟
五色春雲天上節一帆明月水邊樓
豐城劍合雙龍氣銀漢槎懸萬里秋
歸向高堂行慶酒承歡最羨錦衣遊

送馮琢吾殿講典試湖廣

南國詞場詔使開北門學士挾天才
三江橘柚充包匭七澤枌櫨屬翦裁
齊客舊稱吞夢渚楚宮猶擬賦蘭臺

到來蕭瑟逢秋氣
青草湖邊幾日廻

送朱可大兵部典試廣東

世家經術舊知名
奉制掄才萬里征
雨後人辭雙鳳闕
秋來節駐五年城
西江劍合星初動
南海珠收月並明
更羨越王臺畔路
驪歌渾作漢儒生

九月十三夜扈從功德寺陪李漸菴大司寇王
忠銘徐檢菴二學士登金山對月二首

長楊別苑碧山頭
扈蹕登臨暮靄收
正惜巖花過九日

却憐湖月似中秋樓臺近映滄波出燈火深迴翠輦遊
連夕尚方傳賜酒飛觴何幸藉林丘

屬車颯還倚湖濱湖畔青山夜色新爲侍宸遊分象緯
因隨仙履上星辰勾陳影靜千峰月法界烟銷萬騎塵
莫道秋光寒不耐溫泉雲樹暖如春

送蘇中一叅軍內艱南旋

不因惜別重銷魂無限悲心下薊門正對白雲思故國
却從芳草怨王孫亭邊立馬斜陽影隴上啼鵲曉月痕

我亦天涯欲歸客相逢應在武陵源

七夕詠牛女

銀漢橫秋玉露涼雙星猶自似參商
經年脉脉情難授此夜盈盈路轉長
月迥應無鸞入鏡河深寧有鵲爲梁
佳期漫向君平卜天上人間共渺茫

歲暮書懷寄賈石葵年丈

山中歲晏意何如莫訝長安闕報書
魂夢幾悲池畔草封題少遇海邊魚
百年病骨風霜後千里鄉心涕淚餘

望斷石門秋夜月故人獨掩白雲廬

送太宰夢山楊公致仕

長安冠蓋滿郊畿元宰朱輪出禁扉從此聖心勞夢想
只今祖道有光輝宮前柳色分紅旆嶺畔桃花待錦衣
欲問東山舊樵牧麒麟閣上幾人歸

送李容齋符卿冊封魯衡二藩因偕健齋參軍

同行

親攜璽綬出雲間齊魯函封次第頒五月船經滄海郡

千峰人度穆陵關
名藩累葉分茅貴
上客連枝振佩還
舊是平津門下士
送君猶自愴離顏

送朱養淳太史冊封周藩

蓬萊闕下五雲飛
桐葉封函出帝畿
漢苑花香隨使節
河橋柳色上征衣
天臨玉署恩偏渥
星近銀河夜更輝
試向汴京城裏望
六街何處不朱扉

送全玄洲太史冊封趙藩

邯鄲道上夾垂楊
六傳飛塵出建章
趙國河山連右輔

鄴都詞賦在天潢登筵夜對叢臺月染翰春浮玉署香
此日流離知滿路好陳謠俗報君王

送袁玉蟠太史冊封楚藩

赤管年來侍禁中忽銜使節日華東九河雨色過梁苑
七澤秋聲到楚宮故里歌成飛白雪大王賦就起雄風
還朝欲問陳詩事莫采章華達聖聰

送蕭玄圃太史冊封淮藩

天家同姓建諸王歲歲縹緗出尚方三殿雲霞分璽綬

九河簫鼓動帆檣賓筵漫賦淮山桂使索脚攜漢署香
欲問江鄉應未遠鄱湖南去是瀟湘

偕朱可大丞卿王興甫文學會于子冲藩伯於
城西道觀二首

長安城下路漫漫邂逅開尊集舊歡三輔征塵聊駐馬
百年交誼此彈冠從知浪跡同飄梗不道流光迅轉丸
回首垂髫渾似夢脩脩華髮笑中看

五月垂楊覆御溝使君千騎小淹留何知擊筑燕城會

故是談經稷下遊雲起高峰渾欲雨日長仙館只疑秋
平生意氣還諸少酒態相逢可自由

侯甥允吉入京相視送歸

馬上征衫草色青炎天視舅到燕庭黔方客滯元戎幕
魯國名傳博士經離別十年腸欲斷悲歡千緒酒初醒
北堂定憶連枝影爲報今來兩鬢星

送侯大將軍姊丈出鎮貴陽

春草沅江萬里程十年旌節下神京韜鈴自握軒轅陣

敲角重開驃騎營魯國諸生曾避席漢家飛將久知名
燈前把酒猶相問不信封侯事成

平生結客少年場一劍登壇鎮夜郎馬上山川連六詔
匣中風雨渡三湘情知壯志圖龍額無奈離愁數雁行
別後相看萬餘里尺書幾日過衡陽

春日小齋閒居聞澄上人談義

焚香清晝裊茶烟小閣閒叅一指禪浩劫塵機何處解
彼方妙諦幾宗傳有無盡息超塵境種地俱空啟勝緣

身現人天知是幻聞師半偈已泠然

送澄公還東海勞山

出世隨方閱歲華曾承內旨賜袈裟
安禪舊對江干樹卓錫初停海畔槎
花應潮音常作雨日蒸龍氣稍成霞
吾家亦近蓬瀛島白社歸來路未賒

病中遣懷

三月孤齋斗帳寒十旬休沐主恩寬
閒翻藥裹呼兒晒細檢詩筒借客看
千里鄉心芳草綠一年春色杏花殘

浮踪去住渾無賴
行路人間信是難

贈張就山隱君

相逢杯酒說行藏
問字曾師李奉常
梁苑十年依幸舍
商歌一曲擅詞場
鄉心長白山頭月
客鬢桑乾馬上霜
昨夜讀君張翰詠
西風已自斷歸腸

胡竺西山人遊塞上入都坐談邊事

九邊行盡到長安
抵掌論兵髮指冠
厭見羌夷秋入塞
愁聞漢將夜登壇
黃金結客壚頭盡
短缺成歌馬上彈

欲笑當年吳市隱，沉淪空作歲星看。

九日胡竺西過小齋視疾酬和

殘菊牀頭剩欲簪，長安秋色閉門深。
羈懷漫對重陽酒，俠客能爲洛下吟。
說劍寒霜飛大漠，繙經法雨落祇林。
維摩丈室勞相問，已會忘言學陸沉。

真空寺留別馮葛諸丈

蕭疎苑柳寺門前，別色相看一點然。
十月繁霜凋客鬢，重城殘雨上離筵。
心同張翰思吳日，事異梁鴻去漢年。

別後雲山未相間尺書猶有雁南旋

出都書懷寄同遊諸公

長安大道抗離旌
廐吏將車出禁城
恩禮虛同疏兩傳
行藏實愧魯諸生
夢殘芳草山中路
興盡浮雲世上名
惟有灞陵橋畔柳
柔條踈地不勝情

過蘆溝橋

束髮承恩禁苑遊
鄉心今夕渡蘆溝
千峰過雨官橋暮
廿載飛塵客鬢秋
驛路行分三輔界
宮雲回見五城樓

車中却聽渾河水閱盡歸驂日夜流

過莫州故城

一客長安華髮生十年重過莫州城
堤搖野浦長天靜樹夾殘霞片日明
澤國蕭條來往路秋風慘慄古今情
不知擊筑燕臺客有底悲歌氣未平

封御史邢翁八十雙壽二首

濟北賢豪行誼敦年躋上老德彌尊
真封已自稱烏署高隱還應並鹿門
明月千山芳杜若春江九畹茁蘭蓀

仙齡幸際昇平理拾穗謳吟亦主恩

雙闥同拜玉函封壽袞今開第九重青鳥日隨王母侍
白雲常滿丈人峰已看庭際翔三鳳更向壚邊跨兩龍
欲問齊眉吳市隱千秋誰許繼高蹤

賀平陰劉元陽新授四氏學掌教

聞君待詔出長安儒服新裁委貌冠魯國諸生皆聖裔
漢家博士是朝官橋門暮雨陰槐市講席春風自杏壇
回首鄉閭殊未遠北堂魚笋致非難

答周啟明大叅書

握別長安幾歲星人間離合總飄萍
儒臣使節移梁苑病客歸驂出漢庭
卧久山中芳草綠書來河上片雲青
聞今正有宣房役報國無然賦采苓

過汶上贈路鳳岡太守

蕭疎雙鬢感華年把臂相看一惘然
別緒三秋燕市酒生涯百畝汶陽田
高城雨色青驪外閒苑花香白墮邊
爲道池塘春夢苦傷心蜀魄化啼鵲

時聞長公侍
御蜀中哀音

酬寄茅鹿門先生

人宗江左見風流
詞賦名高鶴髮秋
倚馬應閒青玉杖
藏書欲滿白華樓
籬邊松菊陶潛酒
湖上烟波范蠡舟
尺素來時看明月
不知裏許夜珠投

山中報陳玉壘少宰

湖上清秋片月寒
為誰殘夢入長安
一千里外素書到
二十年來良會闌
欲候三台依帝座
先聞六典建天官
他時世業光青史
重向扶陽傳裏看

哭賈德修司馬二首

幾日哀音發嶧州，傷心千緒淚雙流。
那知渭水燕飛地，正是遼城鶴化秋。
幕府勲名留趙魏，詞垣文賦擬枚鄒。
可憐一片長安月，猶照當時舊酒樓。

滿眼悠悠世上名，誰將金石喻交情。
蔣家舊日開三徑，魯國當年並兩生。
只道浮雲輕聚散，不知華月易虧盈。
從今寂寞梅花信，腸斷山陽笛裏聲。

暮過楊劉有感

多年不到楊劉戍此夕馮軒過里門前代津梁無聚落
舊家蘿葛有兒孫烟橫遠隴迷山氣日落平沙見雪痕
水木遺踪多所念惟將悲淚灑空原

贈金陵張文學太初

曾將玉樹擬風姿倒屣驚看絕妙詞雨後青燈揮麈夜
江頭明月掛帆時孫弘首奉西京對韋孟家傳魯國詩
此日淮南叢桂滿不知誰折最高枝

過殷少保先生金輿山房有感

相國名園負郭開朱闌寂寞鎖蒼苔泉聲故自花間出
山色依然座上來多士尚疑懸帳日蒼生空想濟川才
誰憐廿載平津客淚灑東風首重回

卜築黃山別業

歸來四壁故依然卜築桃源別有天種樹新移彭澤柳
買山舊賜水衡錢園林但欲成環堵門巷應教似輞川
廿載行藏君自見乾坤五畝白雲邊

大名王仲木從梅侍御西征奏凱北旋賦此壯

之

十年裘馬客長安杖策從軍戍賀蘭
桓典霜威開幕府陳琳檄草據征鞍
鐃歌出塞邊沙白烽火登城漢幟丹
誰道護羌諸校在功成今日屬儒冠

贈獲嘉岳茂才內日華仙掌一聯乃是夜夢中
句也

雙鳬別路久淒其令子相過慰所思
倚馬梁園新著賦趨庭魯國舊聞詩
日華近傍仙人掌春色高分玉樹枝

儒術承家須俊少卿雲早見繞彤墀

朱光祿可大倚舟河上攜公子過訪對酒話別

蘭橈幾日倚江關命駕相過水竹間
星聚陳荀聊對酒春深黃綺暫還山
分攜易下中年淚落魄難銷烈士顏
愁殺城南新柳色依依青眼若為攀

宿雲翠山洞送可大南還

十年重作碧山遊萬事相看兩鬢秋
夜鶴有情驚別夢巖花無語殢春愁
天開洞壑雙樽酒人去滄浪一葉舟

峰後峰前往來路少時還擬待鳴騶

酬馮學士用韞寄問

宿酒初醒午夢餘春皋小雨試揮鋤忽逢隴上梅花使
為送雲中錦字書別後瑤華常滿袖歸來白髮漸盈梳
聞君亦有東山興海畔秋風掃石閭

鄭生承武自閩來訪

蓬蒿三徑少將迎客有相過萬里程觀樂遊同吳季子
談經業繼鄭康成悲歡往事青燈話要眇新辭白雪聲

他日上林傳賦草應知首問長卿名

夏日東園諸友同鄭承武小會

山園五月海榴開小會欣逢上客來竹裏詩題青玉管
花間酒汎紫霞杯庭皋遠樹留殘雨城堞輕陰閣晚雷
欲似當年河朔飲翩翩詞賦盛論才

謝繹梅中丞過邑賜訪不遇題詩驛壁而去賦
此寄謝

雨後蓬蒿滿徑荒不知千騎過東方憑熊謾駐旌旄色

題鳳還餘藻翰香敢向雲霄踈故舊已從樵牧混行藏
慚君為憶青蒲對回首長安事渺茫

題孫湛明侍御征西卷

朔方昨歲起邊聲繡斧親徵六郡兵漠北烟塵歸指顧
征西車馬藉威名胡笳夜靜昆邪塞漢月春輝敕勒營
猶有遼陽烽火在還將前箸贊昇平

山居懷寄可大

隱几空齋意晏如美人別後底無書未應湖海還浮棹

却想藤蘿已卜居避地自堪遊五嶽逃名誰許問三閭
惟餘遠道長相憶為勸加餐寄鯉魚

寄問馮學士扶侍旋里兼候北上

儒臣啟沃沐恩偏予假寧親輟禁筵春酒自承盤上露
宮衣不散紫頭烟疏家謾擬辭榮日石氏今當卜相年
歸闕何妨尋舊約長安路出岱宗前

酬寄馮學士見問

孤城欲雪雁無聲海畔書來幾日程隔郡關河勞遠夢

多年京洛見交情
青山久絕人間累
白眼閒看世上名
珍重心知酬聖主
應令樵牧覩清平

送鄭承武文學還閩

歸客翩翩玉劍裝
河橋斗酒對飛揚
帆前雨色來吳會
馬上秋聲渡汶陽
萬里攀留徐孺榻
百年寥落陸公莊
從今夢入三山月
夜夜驪珠採海旁

正月四日香山寺閣同侯大將軍送孫湛明侍

御北上二首

寶閣高臨不住天
霏微春色畫闌前
孤城欲墮寒峰雨
野水猶凝遠戍烟
上界香花開勝境
故園風物入新年
屠蘇剩作東林飲
又送離歌到酒邊

尊前山色碧氤氲
徙倚高臺對落曛
闕下春歸周柱史
亭邊夜醉漢將軍
丹霄法從多鷄侶
白社風流有鹿羣
此別澄清應在念
螭頭封事可相聞

春日閒居即事

閒居愁思轉依依
邑里春深正阻饑
深巷炊烟渾欲少

平田蔓草亦應稀中原寇盜還消長海外兵戈有是非
好在黃扉諸相國從容調燮佐宵衣

黃石山堂即事

坐倚青山望翠微堂高不礙掩荆扉千巖落照遙含雨
萬壑秋雲近上衣世路風塵歸後少故人書疏別來稀
十年學道雄心損惟有烟霞未息機

石樓獨坐效長慶體

燕坐危樓日影遲田家幽事亦多岐因防過水移門徑

為礙看山剪樹枝地簡將迎全罷酒人無酬倡少裁詩
年荒正恐烽烟起悵念園葵繫所思

夏日嶽麓山房即事

夜合花開一院香烏皮几畔小胡牀蘿烟撲牖晴猶濕
竹色含秋午亦涼避客總荒蔣詡徑為園半學陸渾莊
只今負郭全堪隱况復青山對草堂

四月五日周師攜尊過嶽麓山房同少泉侯丈

小集

三徑常邀載酒歡
小亭散髮對憑闌
春殘未覺花香盡
日午纔分竹色寒
仙令雙鳬初解綬
將軍萬馬舊登壇
浮名已入高陽會
莫憶人間道路難

時周初歸田侯亦罷將政云

四月十一日侯將軍兄弟邀從亭山先生遊洪
範東流二池宿南天觀登雲翠山絕頂奉和

四首

百尺高臺古樹林
池邊不雨晝蕭森
遊逢載酒春先暮
興到看山客自深
片石千秋留鳥篆
寒潭百尺想龍吟

何時得遂移家計長日垂竿藉綠陰

右洪範池

馬上壺觴處處從
花源又入白雲封
石渠飛沫濺春酒
茅屋臨流響夕春
雨色微侵青薜荔
山光倒映紫芙蓉
南天咫尺今須到
萬壑丹霞宿幾峰

右東流泉

野色嵐光面面新
上清樓閣俯嶙峋
杯間月出瑤臺夜
杖底雲飛玉洞春
地盡羣峰開象緯
天容雙屐出風塵

從今便結羊何侶長與名山作主人

右南天觀玉皇閣

中天積翠削巔峴掃石銜杯醉不冠樵路半垂青嶂底
歌聲全出碧雲端飛來別作仙人掌望去平臨玉女壇
笑問風流彭澤宰白頭曾得幾回看

右天柱峰

夏日侯將軍兄邀陪光祿朱丈遊虎窟山南洞
遇雨奉和

孤岫峒堯隔虎溪還陪雙屐共攀躋尊前雨落珠林暝
洞口雲生寶界迷絕壁泉聲雙樹杪夕陽帆影數峰西
山城舊隱無多地處處都邀綵筆題

朱可大飲餞言別

秋歌一曲入清商斗酒踟躕夜未央子舍應看雲北向
征車却逐雁南翔行藏自信心如水離合相看鬢有霜
聞道尚方孤劍在徵書早晚下明光

秋日送可大南旋


萬里過從樂未休
花時胡不少淹留
東籬曉色方含雨
上苑天香欲報秋
嶽畔攜將三秀草
湖邊歸去一扁舟
豫愁明夜思君處
別酒初醒月滿樓

山中懷寄王對南相君

屈指朋遊歲晚疎
雲中相國比何如
如百年禁苑論交誼
千里關河嘆索居
月落楓林常有夢
鴻歸榆塞久無書
天涯若問同心侶
素髮于今已映梳

甲午除夕

孤懷此夜倍悽然明日應過半百年
瞥眼聲華杯酒外
驚心節序曉鐘邊
圍爐對婦更殘燭
帖勝呼兒覓綵牋
最是春遊關意念
早時留取杖頭錢



穀城山館集卷十三

欽定四庫全書

集部

穀城山館集卷十五

詳校官中書臣沈鳳輝

侍讀臣孫球覆勘

總校官中書臣朱鈐

校對官中書臣吳裕德

騰錄監生臣孟照

欽定四庫全書

穀城山館集卷十四

明 于慎行 撰

七言律詩

乙未元旦試筆

東風一夜滿春城
海畔曛曛旭日生
市里衣冠朋舊誼
田家簫鼓歲時情
花開綵勝嬌相媚
酒到屠蘇黯自驚
遙祝楓宸天未遠
履聲猶似近承明

人日對酒感懷

五十纔過又一春為逢人日轉愁人
寒暄自閱杯中世形影相依夢裏身
舊事莫談溫室樹初衣不染洛京塵
東風底是多情甚吹送霜華入鏡新

十三夜周師邀飲同侯將軍賦

綺席清尊送晚霞節臨元夜豔春華
河橋欲滿城頭月火樹初開雪後花
萬里風塵今對酒百年時序此聞笳
相看可奈踈狂甚爛醉行歌漏轉賒

十六夜陪周師侯兄步月過橋即事

孤城殘雪漏聲寒
燈火稀疏社鼓歡
元夕已過人未醉
小橋重度夜將闌
月華似向瑤臺見
花雨真將玉樹看
回憶長安歌舞地
五侯驕馬正遊盤

夏日山居周文伯起部倚舟過訪

長夏齋居玉樹林
蓬門忽復聽車音
停撓別浦江雲遠
對酒明河夜色深
佩向仙曹分水玉
名從國士重南金
清時報主多同志
野老應餘擊壤吟

周文伯載賜中泠慧山泉水賦謝

過江曾酌南鄆水恨隔毘陵第二泉何意雙甕來遠道
併教五月失炎天香疑露下金莖夜色憶冰分玉井年
小試龍團俱妙品清風兩腋總泠然

輓李北山先生二首

海嶽靈分振代英當年神降是長庚風塵一吏淹華髮
詞賦千秋起盛名紫氣關前何日隱玉樓天上幾時成
愁聽化鶴歸來後嘹唳寒城夜月聲

符璽先朝侍未央
陸沉今古事堪傷
騎箕自應星精位
握槩還為地府郎
篋裏遺書存禪草
壺中大藥失仙方
心期欲解延陵劍
落日悲風起白楊

山中承陳寅所憲伯書問賦謝

都門三紀挹風流
想見今來雪滿頭
雲裏忽傳鴻雁札
山中近隔薜蘿秋
懷人仲舉應懸榻
傲世元龍自倚樓
聞道粉榆新結社
追隨無計覓扁舟

讀高年會詩錄寄壽陳寅所憲伯

華堂高會聚耆英黃髮如雲象赤城四座飛觴喧笑語
百年擊壤沐昇平人浮洛社詩中數事勝襄陽傳裏名
七十主翁猶未老已從仙籍領長生

秋日亭山周師招飲黃石山頂

岿然片石枕雙流載酒登臨欲暮秋萬古長留高士傳
一編曾啟帝師籌川原回合浮佳氣烟樹微茫結遠愁
亦有受書年少客白頭今伴赤松遊

秋日偕亭山先生暨諸親友飲城南寺山石上

南溪不到已經年溪上高丘坐渺然日夕千峰懸片雨
城秋萬木起寒烟人歸洛社真堪隱地入桃源自是仙
眼底舊遊渾欲盡當歌莫惜酒如泉

重建雙檜堂成追憶兩兄有感

背郭堂成傍嶽祠盤桓雙檜憶連枝池塘寂寞逢今日
華萼翩翩是往時高棟重懸初署榜頽垣猶見舊題詩
小山漫自稱真隱隻影誰憐兩鬢絲

閒居效長慶體

乾坤屈指閱行藏不是狂夫老亦狂寵辱百年身似夢
浮湛五畝醉為鄉鷓鴣各自便高下鳬鶴誰能制短長
回首昔遊愁憶汝緇塵偏染鬢成霜

春日承蘇岱髯長史寄問賦此奉酬并謝藥餌
之惠

邯鄲古道魯門西錦字誰將尺素題遇主虞卿初相趙
談天騶衍舊遊齊賦成明月堪疑璧藥就黃金試作泥
此日思君何處切平臯春草正萋萋

初夏陳東甫張仲叅東園小集

竹間三逕午涼新
四月烟光似上春
倚檻青山全入座
隔林黃鳥故窺人
花香零落隨歌管
酒態踈踈傍舞茵
但使求羊能共醉
知他何地有風塵

夏日侯將軍過訪黃石山莊

穀城山畔舊田家
坐客開尊對晚霞
種秫新醅陶令酒
為園近接邵侯瓜
同時朋好人誰在
早歲行藏鬢已華
聞道邊塵今稍靖
儘堪農圃寄生涯

夏日訪侯兄東山別業因閱兩甥行卷

悵別東山歲頗深將軍樓閣鬱蕭森
松濤晝送孤亭雨薜幌晴交滿院陰
萬里風烟今日酒百年兄弟白頭心
吾甥更自多文藻最羨君家桂樹林

樓成

山居雙屐不曾休更為看山旋築樓
倚檻時飛丹嶂雨隔城常對白雲秋
逃名自可成巢隱縱目還堪作卧遊
數卷殘書一杯酒此中合作小菟裘

里翁張慮齋八表二首

寰中信有地行僊八十冰肌類小年華萼曾聯文苑盛
衣冠雅稱素封賢蘭臯夜雨看耕耒綺閣春燈醉舞筵
共慶清時多舊老三朝遺俗口能傳

常將沆瀣當朝餐矍鑠風神世所難走馬自輕飛鞚遠
看花猶劇蹋歌歡青葱日長堂前樹郁烈春芳澤畔蘭
欲向仙臺占壽紀不知渤海幾時乾

濮陽李鴻臚為大父北山先生求銘

名家閥閱未湮淪繩武君今列從臣司馬正當求草日
杜陵猶有乞銘人操觚雅解親文史委佩應堪侍禁宸
海內相逢多世舊休將薄俗浪悲辛

元戎少泉侯兄六十誕辰二首

畫錦高堂列綺茵鳴珂深巷聚雕輪旬周花甲人稱壽
瑞紀桑弧日在辰勝節漫同河朔飲幽居不受玉關塵
憑君試訪延齡藥歲歲瑤觴祝大椿

嬰鑠丹顏鬢未霜牀頭龍劍吐星芒廉公善飯神方王

鄂國徵歌意正長
門樹常嘶金絡馬
庭苔漸澁綠沉槍
君王拊髀應誰問
老將勲名在夜郎

賀王郎季輔新補博士弟子

諸生魯國受經初
標格王郎玉不如
倚馬舊傳文考賦
籠鵝雅學右軍書
家聲此日標瓊樹
世業當年論石渠
手澤應須開萬卷
早懷三策詣公車

寄吳少溪宮錄七十

名家俠節世稱賢
七十餐霞偶列仙
結客長安曾置驛

全宋詩卷之四
買山陽羨久成田書來濟北春鴻遠夢落吳門曉月懸
為問庭前雙玉樹青葱欲賦上林篇

奉寄趙王殿下

長陵佳氣五雲浮大國分茅古冀州兩界河山連魯衛
一時文物盛應劉銅臺月上華池夜玉殿風生桂樹秋
每羨康王舊賓客至今詞賦壓人流

寄送林太華民部報命北上

傾盖長安意頗親山城重枉駐征輪兩河使節歸仙吏

一代家聲屬世臣
路入五雲闕樹曉賦成雙管禁林春
郎曹縱自多文雅誰許青箱事可陳

山居自述呈王對南相君

闕下班行舊日分
海邊名姓少人聞
一竿自釣南溪月
五犇親耕上阪雲
竹徑堂無猿報客
松闕惟有鶴為羣
只緣不忘平生誼
塞雁來時屢夢君

送黃與參水部報使還朝

木落霜臯菊始華
離情咫尺渺天涯
三秋佩擁河隄節

八月星浮漢水槎思客山中踈薜荔緘書白露滿蕪葭
論交何地還傾盖悵望驪駒對晚霞

黃水部便道省覲附候葵陽學士

從橐名郎滿屬車世家吳越邈誰如傳經夙受金華草
問水初藏玉簡書遠道西風回使節片帆秋色過鄉閭
趨庭為叩東山履早晚徵函下石渠

馮宗伯請急東旋寄候

六傳西風簇繡鞍都門又作畫圖看應緣斗畔星辰逼

不為人間道路難
漢闕恩光深
子告齊城佳氣滿
承歡思君此際還
千里愁聽秋聲木
葉丹

馮宗伯居廬書至答慰

空山華月渺愁予
此夕風前得報書
千里人歸滄海路
百年淚盡白雲廬
方從宿草悲陳迹
况對寒梅憶索居
聞道蓼莪詩總廢
春園那不賦潘輿

丙申除夕獨坐

婆娑雙鬢坐寒宵
鼓籥驚心倍泐寥
駒隙百年逢節序

鶉居五畝寄漁樵雲屏舊自楓宸賜臘醞先將栢葉調
常記南宮封印出猶題尺疏勸春朝

丁酉元日試筆

隔歲逢春雪未乾春風元日入椒盤即看淑影蒸雲氣
已覺晴光到蕙蘭天外音書渾欲斷眼中兒女劇為歡
門前好問朝正使溟海邊烽可報安

人日親友夜集

人日陰雲起岸沙不知春色落誰家寒更怯對歌邊酒

短髮羞簪勝裏花
擲罷明瓊呼得雉
燒殘銀燭聽啼鴉
相看一笑渾難事
莫惜追歡負歲華

元夕觀燈呈張君侯

孤城此夜豔年芳
巷陌絃歌玉漏長
殘雪離迷明月影
踈燈隱閃畫橋光
笛中折柳聲新聽
馬上傳柑事未忘
為報河陽仙令道
春風花樹已飛香

正月十五日李黃羽司理行部過訪

中州文苑舊名家
結駟相過巷路賒
雪後初傾元夜酒

燈前已發上林花六條問俗推星使兩世論交感歲華
為訊高堂容鬢好春山誰伴采明霞

山中懷寄李比部滄浪

西京仙吏久分攜遠道傳書報每遲恨別無因重對酒
追歡只記舊題詩春留海上金光草慶衍堂前玉樹枝
何地思君倍惆悵山城落月夢醒時

懷寄玄同宗侯

春風吹夢綠雲端此際思君蕙草寒北海才名應振世

鄴都詞賦早登壇每從斗畔占精氣轉向樊中惜羽翰
天祿藏書如可校青藜夜色許誰看

懷寄貞白宗侯

奎宿長臨岱嶽懸天家今日盛才賢圖書七略分中壘
文史三冬屬少年魯國諸生多避席梁園詞客半隨肩
不須別授平臺簡自有靈光賦可傳

暮春邢侍御子愿命駕過訪夜談喜賦

十五年來繫夢思軒車何意到茅茨探春正及花開候

對酒還當月上時色動青天看倚劍寒生白雪坐論詩
芳樽十日君休厭眼底交情更有誰

子愿東園小集和韻

草玄亭閣負山城上日開尊命友生花事欲闌初駐馬
柳陰纔合已聞鶯林中幾醉平原酒雲裏疑飄洛苑笙
廿載相看渾似夢白頭繾綣不勝情

子愿告還敘別

窮遊殊未罄交歡纔道分攜意轉難湖海何人能命駕

乾坤今日少彈冠世情總付雙尊酒生事惟餘一釣竿
却羨紅顏渾未改憂時還復勸加餐

山中逢吳閬薛文學是韓宗伯丈門人附書問
訊

坐中有客自南州為問傳經憶昔遊別日埧簾三殿草
歸來雲樹五湖舟春山見月頻疑夢遠道緘書倍結愁
欲識瀛洲圖畫裏同時強半雪盈頭

韓丈繪登瀛圖列
館中同年畫像

春暮與陳東甫飲白莊柳樹下懷傅伯俊侍御

時有驛使投書語中及之

門前五柳映樓居倚杖看山迥自如夕雨霏微芳草路
人家歷亂白雲墟田間斗酒為君醉隴上梅花何處書
却憶薄遊周柱史江南春色滿回車

殷洗心中翰奉使取道過訪

林花落盡殢鶯歌谷口勞君結駟過使節三春來內苑
征軺五月渡黃河含香池上家聲遠揮麈尊前俠氣多
聞道螭頭封事在扶桑何日息鯨波

山中懷寄御史大夫漸菴李公

雙闕觚稜漢苑秋當時曾御李膺遊乾坤別後多戎馬
湖海年來有釣舟華嶽雲峰天外聳函關紫氣日邊浮
同朝晚進公應記一卧滄江亦白頭

承趙國主賜問并賚刻書二種敬因蘇長史奉
謝

綠雲縹緲隔清漳玉札封題到草堂閣上青藜開壁府
枕中鴻寶示仙方東平樂善偏承寵北海工書久播芳

更羨名家蘇季子白頭簪筆侍君王

九月七日南昌太守王君華岡過訪東郭小園

有詩見遺酬贈

負郭停驂路未賒孤亭塵尾發烟霞題詩坐聽千林雨
對酒先看九日花寥落山中逢勝侶風流江表見名家
知君佩有豐城劍斗畔何人識物華

送朱可久文學南歸

前年此日雙鴻影今見孤鴻思不禁燕市黃金難得意

楚天白雪重知音秋聲蕭瑟來杯酒舊事淒涼結寸心
華閱才名歸二阮君家桂樹總成林

送朱長倩文學南歸

山城木落菊花前杯酒逢君意黯然和氏且須懷白璧
干將終自倚青天孤帆別路三千里兩世交情四十年
此後雲霄長在望早看橐筆賦甘泉

九月十三日大雪唐君平文學入對過訪有詩

見投賦贈

卷十四
清秋多病罷登臺卧閣因君一舉杯
玄雁自逢江上度
菊花何意雪中開
高歌郢里驚人調
健筆梁園作賦才
不是關山寒色早
上林瓊樹若為栽

寄王對南相君

午橋花竹為誰歡
毋謂成功在考槃
海上烟塵方絡繹
中原黎庶欲凋殘
輿情此日歸司馬
揆路何年起謝安
同學老生無世慮
亦題尺牘勸加餐

讀許雲村先生小傳有述

紫雲峰下石為閭尚想幽人舊隱居避俗青春違禁闥
移家白首寄樵漁名標吳國先賢傳手校西京太史書
此日緇囊餘諫草臺郎封事滿公車

南天觀追憶許鍊師悵然有作

曾向三山訪列真重來不道海成塵峰頭鶴化猶疑夢
洞口猿啼別是春玉觀淒涼花似雨松臺寂寞草為茵
仙家日月還如此人代茫茫可更論

攜陳山人東甫飲黃石山頂

黃山片石如斗大與爾捫蘿到上頭
擊劍放歌雲霧裂
攀崖送酒猿猱愁
咸陽帝子何事業
圯上老人無土丘
兵戈滿眼那得問
元龍嘯傲真吾儔

送邑侯瀛海張君入覲二首

管子臺西汶水寒
朝正駟馬向長安
齊城吏績徵三異
渤海家聲起二難
日近宮雲春自早
烟消津柳雪初殘
遙知課最承恩處
內殿黃金擁漢官

幾月鳴琴單父堂
絃歌聲滿百花香
詞華舊羨題鸚鵡

政化新傳下鳳凰
天向九關開
左个人從千騎發東方
朝回好乞金莖露
綠服春風一舉觴

阿城舟中送別張洪陽宮保南旋

一笑相看共白頭
君今亦遂碧山遊
憂時早辟留侯穀
蹈海初浮越相舟
千里人隨江浦月
十年書隔薊門秋
燈前斗酒休辭醉
別後關河雁亦愁

秋日邀張令君侯都護野集溪亭用韻奉和

小築漁磯構野亭
心期久已托山靈
何緣斗畔郎官宿

忽傍江頭處士星對酒峰霞侵晚樹垂竿溪雨散秋萍
烟波自識逃名理不向人間問醉醒

張令君汎舟南溪用韻奉和

一曲清流鏡遠空蘭橈初試藕花紅鷗鳬影亂千峰雨
蘆荻聲殘兩岸風嘯詠何人兼吏隱江湖此地屬漁翁
兒童亦識高陽醉拍手銅鞮唱轉工

馮宗伯書來知以隕珠之感遂輟西遊因寄詩

見問用韻慰謝二首

契濶多年想盍簪花前惆悵發郵籤海門又緩青絲鞵
嶽觀終虛白玉函為惜明珠曾照夜可知春草更宜男
時艱正復資匡輔共指星華在斗南

十年心事未曾違黃石春深長蕨薇漫憶封章傳畫省
虛慙經術侍彤闈山中姓字無榮辱天上風雲有是非
為謝故人多記念白頭已老薜蘿衣

崔仲素郡丞寄詩見壽用韻奉答二首

山城別後想鳴珂五見春風長綠蘿漢室新紉循吏傳

燕臺舊和酒人歌林中朋輩看全少海畔烟霞占已多
十二樓臺秋色裏不知幾處有行窩

不記雕弧此日懸敢勞三祝寄華箋浮沉大塊虛稱老
嘯浪深杯久避賢百畝桑麻山澗曲一丘花樹浦雲邊
人間何地還堪往已借蓬玄小洞天

送傅伯俊侍御詣闕

結廬同卧岱宗雲無那離歌此日聞江路靡無人欲盡
春林猿鳥自相羣休嗟華髮長為客剩有青山可待君

主聖時危須努力且看麟閣勒功勲

題烟波釣叟圖

門外汀莎映倚欄百年生事五湖寬
烟簑夜掛芙蓉雨荻月寒浮翡翠竿
半醉漁歌花裏聽清秋鶴髮鏡中看
天家近日多征稅祇有滄浪卧尚安

七月望夜與劉晉川司空約會南旺湖舟中賦

贈二首

湖上蒹葭白露秋司空小隊若為留
十年不對陳徐榻

百里同登李郭舟卷幔踈燈搖浦樹停杯涼月墮津樓
那堪細數生平事無限悲歡是舊遊

華髮相逢意轉殷當年藜閣共論文元卿地應夢龍會
野老名逃鹿豕羣此夜占星知近斗明朝望嶽欲生雲
惟餘別思如圓月不逐河流兩派分

司空別去登岱
舟在分水廟前

同馮用韞少宰登岱因送北上

三年書札鎮相聞倚杖高丘此送君
憐慄秋聲天末起微茫海色霧中分
情關離合詩難就興到登臨酒易醺

頗訝連朝多雨氣已知攜出上峰雲

九日登三陽觀與馮用韞學士公孝與文學言

別

神霄峰下有仙壇送遠還同斗際看地近三天秋氣凜
節逢九日酒杯寬紅塵閱代多新事白首論交少舊歡
此別良遊恐難再惟將萸菊勸加餐

送魯雲松博士遷郾城掌教

漢家博士雅傳經忽訝銜魚落講庭五月梁園塵似雨

十年魯壁鬢如星鄉心芳草從前綠客味寒氊依舊青
此日諸生同祖道驪駒歌斷不堪聽

穀城山館集卷十四